

四庫全書

子部

欽定四庫全書

子部

雲笈七籤卷百一

詳校官監察御史臣邱庭澍

檢討臣何思鈞覆勘

總校官庶吉士臣倉聖脉

校對官中書臣金光悌

謄錄監生臣蔣如燕

欽定四庫全書

雲笈七籤卷一百

宋 張君房 撰

紀

真宗皇帝御製先天紀叙

蓋聞幽通造化是謂神功胥洎範圍斯云聖迹若乃六合無外億世相因仰之若日星遵之若繩墨上賓之御默贊於高旻長發之祥隆興於丕緒故當適追盛烈昭示羣倫廣五典之闕疑為六經之首冠者也思文聖祖

肇初生民時屬洪荒政方樸畧儲精曾宙下撫於八紘  
應運中央茂宣於三統先覺以化庶彙總已以御衆靈  
涿鹿觀兵濟人而定難梁峯紀號奉天而告成順拜峒  
山所以尊乎沖妙輕舉治谷所以登乎紫清俗畏其神  
民習其教九國承於世紀三代繼於大宗宜乎竹帛之  
文紀丕功而罔盡車書之域仰遺迹而咸周豈止唐堯  
之協和萬邦姬文之本支百世庖犧之始畫八卦高辛  
之正是五行者哉顧以眇躬紹茲寶厯元符之降實荷

於鴻仁真馭之臨獲聞於諄誨知開先之有自懷積累  
之無疆由是寶綬以奉徽稱棟宇以新原廟夙夜之意  
靡捨於歸尊卿士之心彌思乎順美樞密使檢校太尉  
同平章事王欽若樞機協贊文史博通仰錫羨於元都  
徇追崇於涼德覃精紬素盡銓魯壁之編率勵鉛黃感  
正晉河之誤以至琅函瓊蘊竹簡芸籤遠訪名山近觀  
藏室羣分類聚索隱造微續集成書蓋無乎遺論封章  
來上尤見乎資忠庶諧永世之期求乃冠篇之作慶基

紹祚思祖德之垂鴻悖史揚輝表孫謀之繼志雖有慙  
於麗薄蓋聊叙乎徽音式製佳名用標緇袞題曰先天  
紀冀夫恢隆世表丕顯天宗龍門補藝之言常傳其實  
錄闕里升堂之士莫得而措辭云爾

軒轅本紀

軒轅黃帝姓公孫

自周制五等諸侯後乃有公孫姓軒轅為黃帝長於姬水合以姬為姓不

知古史何據也

有熊國君少典之次子也

伏羲生少典少典生神農及黃帝襲帝位

居有熊之封焉

其母西喬氏女名附寶暝見大電光繞北斗樞

星照於郊野附寶感之而有娠以樞星降又名曰天樞

懷之二十四月生軒轅於壽丘

地名在魯東門之外

帝生而神靈

幼而徇齊

疾而速也

弱而能言長而敦敏成而聰明龍顏

日角河目隆顙蒼色大肩始學於大項長於姬水帝年

十五心慮無所不通乃受國於有熊襲封君之地

在鄭州新

鄭縣以制作軒冕乃號軒轅以土德王曰黃帝得奢龍辨

乎東方

解在下文得祝融辨乎南方

心星以火火在正南大明也融光明也主火之

官號祝融南字從南從午南求也求

正對為明為暗則南為陽北為陰也得火封辨乎西方

酉之半也

雞之鳴旦則望東而身居西也酉雞也以小入時名之酉半為酉也得后土辨

乎北方

北陰也背也故曰北四方之名也東者動也日出萬物乃動也東字從日穿木以日出望之如

穿扶桑之林木也日所出在扶桑東數十萬里

帝娶西陵氏於大梁曰嫫祖為

元妃生二子玄囂昌意初喜天下之戴已也養正娛命

自取安而順之為鴻黃之代以一民也時人未使而自

化未賞而民勸其心愉而不偽其事素而不飾謂之太

清之始也耕者不侵畔漁者不爭岸抵市不預價市不

閉鄙商旅之人相讓以財外戶不閉是謂大同帝理天

下十五年之後憂念黎庶之不理竭聰明進智力以營

百姓具修德也考其功德而務其法教時元妃西陵氏

始養蠶為絲

今禮記皇后祭先蠶西陵氏葛稚川西京記曰宮內有先蠶壇

乃有天老

五聖以佐理化帝取伏羲氏之卦象法而用之據神農

所重六十四卦之義帝乃作八卦之說謂之八索求其

重卦之義也時有臣曹胡造衣臣伯余造裳臣於則造

履帝因之作冠冕

冠者則服之又名冕者則冠中之別名以其後高前下有俛仰之形因曰

冠冕

始代毛革之弊所謂黃帝垂衣裳而天下理也帝

因以別尊卑令男女異處而居取法乾坤天尊地卑之義帝見浮葉方為舟即有共鼓化狄三臣助作舟楫所謂剡木為舟剡木為楫也以取諸渙渙散也物大通也所以濟不通也帝又觀轉蓬之象以作車時有神馬出生澤中因名澤馬一曰吉光又曰吉良出大封國

亳州東古

國文馬縞身朱鬣乘之壽千歲以聖人為政應而出

今飛

龍司有吉良廐因此也薛綜曰與騰黃一也所出之國各別葛稚川曰騰黃之馬吉光之獸則獸馬各異今據

吉光即馬騰黃即獸稚川之說又別又有騰黃神獸其色黃狀如狐背上

有兩角龍翼

一本云龍翼而馬身一名乘黃一名飛黃或曰古黃又曰翠黃出日本國壽三千歲

日行萬里乘此令人壽二千歲

出日本國壽二千歲

六典曰宋齊梁陳皆有車府乘黃之

官今太僕寺有乘黃署即其事

黃帝得而乘之遂周旋六合所謂乘八

翼之龍遊天下也故遷徙往來無常帝始教人乘馬有

臣胘作服牛以用之世本云所謂服牛乘馬引重致遠

以取諸隨得隨所宜也有臣黃雍父始作春所謂斷木

為杵掘地為臼以濟萬人取諸小過也小過者過而通

也帝作竈以著經始令鑄釜造甑乃蒸飯而烹粥以易

茹毛飯血之弊有臣揮始作弓臣夷牟作矢所謂弦木

為弧剡木為矢也

史記云黃帝為之也

弧矢之利以威天下取諸

睽睽垂也制不順也帝始作屋築宮室以避寒暑燥濕

謂之宮室言處於中也所謂上棟下宇以待風雨取諸

大壯大者壯也帝又令築城邑以居之始改巢居穴處

之弊又重門擊柝以待暴客以取諸豫備不虞也又易

古之衣薪莖以棺槨以取諸大過也帝服齋於中宮於

洛水上坐玄扈石室與容光等觀忽有大鳥銜圖置於

帝前帝再拜受之是鳥狀如鶴而雞頭鶯喙龜頸龍形  
駢翼魚尾體備五色三文成字首文曰慎德背文曰信  
義膺文曰仁智天老曰是鳥麟前鹿後蛇頸背有龍文  
足履正尾繫武有九苞一口包命二心合度三耳聰達  
四舌屈伸五采色備六冠鉅銳鉤七金目鮮明八音激  
揚九腹大一名鷗其雄曰鳳其雌曰凰高五六尺朝鳴曰  
登晨晝鳴曰上祥夕鳴曰歸昌昏鳴曰固常夜鳴曰保  
長皆應律呂見則天下安寧黃帝曰是鳥遇亂則去居

九夷矣出於東方君子之國又出丹穴之山有巨沮頌

蒼頡觀鳥跡以作文字此文字之始也

先儒論文字之始不同或始於

三皇或始於伏羲或云與天地並興今據司馬遷班固韋延宋衷傳玄等云蒼頡黃帝臣今據此載之諸家說

蒼頡亦無定據

黃帝修德義天下大理乃召天老謂之曰吾夢

兩龍挺白圖出於河以授予敢問於子天老對曰此河圖洛

書將出之狀天其授帝乎試齋戒觀之黃帝乃齋於中

宮衣黃服戴黃冕駕黃龍之乘載交龍之旂與天老五

聖遊於河洛之間求夢未得帝遂沉璧於河乃大霧三

日又至翠嬌之泉有大鱸魚於河中沂流而至殺三牲以醺之即甚雨七日七夜有黃龍負圖而出於河黃帝謂天老五聖曰子見河中者乎天老五聖乃前跪授之其圖五色畢具白圖蘭葉而朱文以授黃帝乃舒視之名曰綠錯圖令侍臣寫之以示天下黃帝曰此謂河圖書是歲之秋也帝既得龍鳳之圖書蒼頡之文即制文章始代結繩之政以作書契蓋取諸夬夬決也決斷萬事

自垂衣裳至制文字凡九事按皇甫謐帝王代記載此九事皆黃帝之功今各以當時事及衆書所載列

之如前以明之然於易繫說此九事則上自黃帝下至堯舜以其先儒說者或以為不獨黃帝若以皇甫所載及今所引衆書則九事皆黃帝始創制之以服用後代聖人至堯舜但繼作修飾爾於是黃帝定百物之名作八卦之說謂之八索一號帝鴻氏一號歸藏氏乃名所制曰歸藏書此易之始也黃帝垂衣裳之後作龍袞之服畫日月星辰於衣上以象天故有龍袞之頌帝納女節為妃其後女節見大星如虹下臨華渚女節感而接之生少皞代記云女節即嫫祖非也帝又納醜女號嫫母使訓宮人而有淑德奏六德之頌又納費修氏為夫

人是時庶民甘其食美其服樂其俗安其居無羨欲之心鄰國相望雞犬之音相聞至老而不相往來無求故也所謂黃帝理天下便民心謂之至理之代是時風不鳴條謂之天下之喜風也雨不破塊謂十日一小雨應天下文十五日一大雨以叶運也以嘉禾為糧謂大禾也其穗異常以醴泉為漿謂泉水味美如酒可以養老也以五芝為芳謂有異草生於圃則芝英紫芝金芝黑芝五芝草生皆神仙上藥時有水物洋溢山車滿野於

是德感上天故有黃星之祥謂之異星形狀似月助月  
為光名曰景星又有赤方氣與青方氣相連赤方中有  
二星青方中有一星凡三星又有異草生於庭月一日  
生一葉至十五日生十五葉至十六日一葉落至三十  
日落盡若小月即一莢厭而不落謂之莫莢以明於月  
也亦曰歷莢帝因鑄鏡以象之為十五面神鏡寶鏡也  
於時大撓能探五行之情占北斗衡所指乃作甲乙十  
干以名日立子丑十二辰以名月以鳥獸配為十二辰

屬之以成六旬謂造甲子也黃帝觀伏犧之三畫成卦  
八卦合成二十四氣即作紀歷以定年也帝敬大撓以  
為師因每方配三辰立孟仲季自是有陰陽之法焉黃  
帝聞之乃服黃衣帶黃紳首黃冠齋於中宮即有鳳凰  
蔽日而至帝乃降階東面再拜稽首曰天降丕祐敢不  
承命鳳乃止帝東園集於梧桐又巢於阿閣非竹實不  
食非醴泉不飲其飲也則自鳴舞音如笙簫帝即使伶  
倫往大夏之西

大夏國在西  
去長安萬里

阮榆之谿崑崙之陰嶰谷

采龍鍾之竹取其竅厚均者斷兩節間三寸七分吹之

為黃鍾之音

十一月律為黃鍾謂冬至一陽生萬物之始也

以本至理之代天

地之風氣所謂黃帝能理日月之行調陰陽之氣為十

二律呂雄雌各六也

晉書云律管長尺六孔十二月之音稟之以竹取自然圓虛也以玉

取堅貞溫潤也

時有女媧之後容成氏善知音律始造律厯元

起辛卯又推冬至日在之星

南斗後星也

又問天老得天元

日月星辰之書天文刻漏之書以紀時有臣隸首善算

法始作數著算術焉臣伶倫作權量

權秤也量即斗斛也

黃帝得

蚩尤始明乎天文

據管子言之蚩尤有術後乃叛

帝又獲寶鼎乃迎日

推策於是順天地之紀旁羅日月星辰作蓋天儀測立象推分星度以二十八宿為十二次角亢為壽星之次房心為大火之次箕斗為析木之次牛女為星紀之次虛危為玄枵之次室壁為諏訥之次奎婁為降婁之次昂畢為大梁之次觜參為實沉之次井鬼為鶉首之次星張為朱火之次翼轸為鶉尾之次立中外之星作占日月之書此始為觀象之法也皆自河圖而演之又使

義和占日常儀占月鬼吏區占星帝作占候之法占日之書以明休咎焉黃帝有茂德感真人來遊玉池至德所致也有瑞獸在囿玄枵之獸也尚書中候云麋身牛尾狼蹄一角角端有肉示不傷物也音中黃鍾文章彬彬然牝曰麒麟牡曰麟生於火遊於土春鳴曰歸禾夏鳴曰扶幼秋冬鳴曰養信帝又得微蟲蛄螻有大如羊者大如牛者蟲名蝻大如虹者應土德之王也有獸名螭如師子食虎而循常近人或來入室人畏而患之帝乃

上奏於天徙之北荒帝以景雲之瑞慶雲之祥即以雲

紀官官以雲為名故有縉雲之官

或云帝鍊金丹有縉雲之瑞自號縉雲氏

赤多白少為縉

於是設官分職以雲命官春為青雲官夏為縉

雲官秋為白雲官冬為黑雲官帝以雲為師也是時炎

帝之裔姜姓者也縉雲者帝之祥雲其雲非雲非煙非

紅非紫又以帝鍊丹於婺州縉雲之堂有此祥雲也帝

置四史官令沮誦蒼頡隸首孔甲居其職主圖籍也

周禮

掌版圖人戶版籍也

又令蒼頡主人儀孔甲始作盤盂以代四尊

坯飲之朴著盤孟篇盤孟之誠也帝作巾几之法以著

經黃帝書中通理黃帝史謂之墳墳大也

孔安國曰遭秦焚之不可

也聞有臣史王始造畫又濟南人公玉帶上黃帝明堂圖

有複道上有樓從西南入此樓之始也帝依圖制之曰  
合宮可以觀其行也乃立明堂之議以觀於賢也時有  
仙伯出於岐山下號岐伯善說草木之藥性味為大醫  
帝請主方藥帝乃修神農所嘗百草性味以理疾者作  
內外經又有雷公述炮炙方定藥性之善惡扁鵲俞跗

二臣定脉經療萬姓所疾帝以扁鵲論脉法撰脉書上

下經

漢文里陽公淳于意能知疾之生死按脉經也

帝問岐伯脉法又制素問

等書及內經

今有二帙各九卷後來就修之按素問序云岐伯作今卷數大約闕少其八十一難

後來增修又云天降素女以治人疾帝問之遂作素問也

帝問少俞鍼注乃制鍼經

明堂圖灸之法此鍼藥之始也黃帝理天下始以中方

之色稱號初居有熊之國曰有熊帝

如顓頊為高陽帝帝譽為高辛帝唐

堯為陶唐帝也

不好戰爭當神農之八代榆罔始衰諸侯相侵

以黃帝稱中方故四方僭號亦各以方色稱

史載而不言名號即

青帝太皞赤帝神農白帝少昊黑帝顓頊時有四帝之後子孫僭越而妄有稱者也僉共謀之邊

城日駭黃帝乃罷臺榭之役省靡麗之財周戎士築營

壘帝問於首陽山

在河中郡不安其居

令采首山之金始鑄刀造

弩有於東海流波山得奇獸狀如牛蒼身無角一足能出入水吐水則生風雨光如日月其音如雷名曰夔牛

帝令殺之以其皮冒之以為鼓以擊之聲聞五百里

世本

云殷巫咸始作鼓則非也

帝令軍人吹角為龍鳴此鼓角之始也於

是又令作蹴鞠之戲以練武士

今擊毬也西京記曰鞠場即毬場也

黃帝

云日中必焚操刀必割狂屈豎聞之曰黃帝知言也帝

有天下之二十有二年忽有蚩尤氏不恭帝命諸侯中

彊暴者也兄弟八十人並獸身人語銅頭鐵額不食五

穀啗沙吞石

蚩尤始作鎧甲兜牟時人不識謂是銅頭鐵額李太白曰南人兵士見北地人所食

麥飯糗糧不識謂之啗沙吞石以喻於此

不用帝命作五虐之刑以害黎庶

於葛盧山發金作冶制為鎧甲及劍造立兵仗刀戟大

弩等威震天下不順帝命帝欲伐之徵諸侯一十五旬

未剋敵思念賢哲以輔佐將征不義乃夢見大風吹天

下塵垢又夢一人執千鈞之弩驅羊數萬羣覺而思曰  
風號令執政者也垢去土解化清者也天下當有姓風  
名后者夫千鈞之弩冀力能遠者也驅羊萬羣是牧人  
為善者也豈有姓力名牧者乎帝作此二夢及前數夢  
龍神之驗即作夢之書令依二夢求其人得風后於海  
隅得力牧於大澤即舉風后以理民初為侍中後登為  
相力牧以為將此將相之始也以大鴻為佐理於是順  
天下之紀幽明之數生死之說是謂帝之謀臣也帝問

張若謀敵之事張若曰不如力收能於推步之術著兵法十三卷可用之乃習其干戈以征弗享始制三公之

職以象三台

天象有三台星

風后配上台天老配中台五聖配

下台

太公六韜曰風后力收五聖為七公則五聖五人也

黃帝於是取合己者四

人謂之四面而理時獲寶鼎迎日推策又得風胡為將作五牙旗及烽火戰攻之具著兵法五篇又以神皇為將帝之夫人費修之子為太子好張羅及弓矢以大將謂之撫軍大元帥為王前敵張若力收為行軍左右別

乘以容光為大司馬統六司兼掌邦國之九法

容光一曰常光

又

置左右大監監于萬國臣龍紆者有勇有義亦為將帝

之行也以師兵為營衛乃與榆罔合謀共擊蚩尤帝以

玉為兵

玉飾兵器

帝服黃冕駕象車交六龍大丙太一為御

載交龍之旂張五牙綵旗引之以定方位東方青牙旗

餘各依方色帝之行也常有五色雲氣狀金枝玉葉止

於帝上如葩華之象帝因令作華蓋

今之織蓋是也

黃帝即與

蚩尤大戰於涿鹿之野

地在上谷郡南有涿鹿城

帝未克敵蚩尤作

百里大霧彌三日帝之軍人皆迷惑乃令風后法斗機

作指南車以別四方

崔豹古今注曰周公作指南之車據此時已有指南車即周公再修

之

爾帝乃戰未勝歸太山之阿慘然而寐夢見西王母遣

道人披玄狐之衣以符受帝曰太一在前天一在後得  
之者勝戰則剋矣帝覺而思之未悉其意即召風后告  
之后曰此天應也戰必剋矣置壇祈之帝依以設壇稽  
首再拜果得符廣三寸長一尺青色以血為文即佩之  
仰天歎所未捷以精思之感天大霧冥冥三日三夜天

降一婦人人首鳥身帝見稽首再拜而伏婦人曰吾玄女

也有疑問之帝曰蚩尤暴人殘物小子欲萬戰萬勝也

玄女教帝三宮祕略五音權謀陰陽之術

兵法謂玄女戰術也衛公

李靖用九天玄女是也又神符黃帝之符

也陰陽術即六壬太一道甲運式法也

玄女傳陰符

經三百言帝觀之十旬討伏蚩尤授帝靈寶五符真文

及兵信符帝服佩之滅蚩尤又令風后演河圖法而為

式用之創十八局名曰遁甲

周公時約為七十二局漢張子房共向映一云四皓

議之為十八局案神龍負圖文遁其甲乃名之遁甲今為一局揭帖是也

以推主客勝負之

術黃帝又著十六神歷推太一六壬等法又述六甲陰

陽之道作勝負握機之圖及法要訣黃帝兵法三卷

宋武

傳云神人出之

河圖出軍訣稱黃帝得王母兵符又有出軍大

帥年命立成各一卷太一兵歷一卷黃帝出軍新用訣

一十二卷黃帝夏氏占兵氣六卷

此書至夏后時重修之也

黃帝十

八陣圖二卷

諸葛亮重修為八陣之圖

黃帝問玄女之法三卷風后

孤虛訣二十卷務成子玄兵災異占十四卷鬼吏區兵

法三卷圖一卷

或作鬼谷區設兵法以來皆起於黃帝亦後來增修也

黃帝於是

納五音之策以審攻戰之事復率諸侯再伐蚩尤於冀  
州蚩尤率魍魎魍魎請風伯雨師從天大風而來命應  
龍蓄水以攻黃帝黃帝請風伯雨師及天下女祆以止  
雨於東荒之地北隅諸山黎土羌兵驅應龍以處南極  
殺蚩尤與夸父不得復上故其下旱所居皆不雨蚩尤  
乃敗於顧泉遂殺之於中冀其地因名絕轡之野

州在端也

既擒殺蚩尤乃遷其庶類善者於鄒屠之鄉其惡者以  
木械之帝令畫蚩尤之形於旗上以厭邪魅名蚩尤旗

殺蚩尤於黎山之丘

東荒之北隅也

擲械於大荒之中宋山之

上其械後化為楓木之林

山海經曰融天山有楓木之林蚩尤之桎梏所化也

所

殺蚩尤身首異處帝閔之令塋其首家於壽張

縣名在鄆州家

高七尺土人常以十月祀之則赤氣如絳見謂之蚩尤旗

其肩髀冢在山陽

縣名在楚州肩

脊府藏也其髀冢在鉅鹿

邢州鉅鹿縣也

收得蚩尤兵書行軍祕術

一卷蚩尤兵法二卷黃帝都於涿鹿城

上谷郡涿州地名獨鹿又曰濁

鹿聲傳記誤也

黃帝又與榆罔爭天下榆罔恃神農帝之後故

爭之黃帝始以鵬鵠鷹鷄一云隼之羽為旗幟

六典曰今鵠鷄

旗也

以熊羆貔虎為前驅戰於阪泉之野

地名在上谷郡今媯州也

三

戰而後剋之帝又北逐獯鬻之戎

即匈奴也

諸侯有不從者

帝皆率而征之凡五十二戰天下大定帝以伐叛之功

始令岐伯作車樂鼓吹謂之簫鏡歌以為軍之警衛柵

鼓曲靈夔吼鵬鶚爭石墜崖壯士怒玄雲朱鷺等曲所

以揚武德也謂之凱歌

六典曰漢時張騫得之於西域凡入曲軍樂之遺音簫笳也金

鏡如鈴而無舌有柄執之以止鼓也

於是諸侯咸尊軒轅為天子帝以已

酉歲立承神農之後火生土帝以土德稱王天下號黃

帝位居中央臨制四方帝破山通道未嘗寧居令風后  
負壽書伯常荷劒旦出流沙夕歸陰浦行萬里而一息  
反涿鹿之阿帝又試百神而朝之帝問風后予欲知河  
所泄對曰河凡有五皆始於崑崙之墟黃河出於崑崙

山東南脚下即其一也

餘四河說在於東方朔十洲記

帝令豎亥步自

東極至於西極得五億十選九千八百八步

一云二億三萬三千

南北二億三萬一千三百里

二億二十萬

豎亥左手把算右

手指青丘北東盡泰遠西窮邠國東西得二萬八千里

南北得二萬六千里

萬里曰選神農時東西九千萬里南北八千萬里逾四海之外韋昭

注漢書不信此濶遠於海外臣瓚據道書神農乘龍遊遠也黃帝乘馬以理土境祗四海內也淮南子云北極至於南極二億三萬三千五百七十里也淮南王學道此言絕遠亦據道書也黃帝始畫野分

州令百郡大臣授德教者先列珪玉於蘭蒲席上使春

雜寶為屑以沉榆之膠和之為泥以分土別尊卑之位

與華戎之異文出封禪記帝旁行天下得百里之國者

萬區

今之縣邑者也

所謂首出庶物萬國咸寧有青烏子能相

地理帝問之以制經帝又問地老說五方之利害時有

瑞草生帝庭名屈軼佞人入則指之是以佞人不敢進  
時外國有以神獸來進名獬豸如鹿一角置於朝不直  
之臣獸即觸之帝問食何物對曰春夏處水澤秋冬處  
松竹此獸兩目似熊容成子有道知律者女媧之後初  
為黃帝造律歷元起辛卯至此時造笙以象鳳鳴素女  
於廣都來教帝以鼓五十絃瑟古史考曰琴則非也黃帝損之為  
二十五絃其瑟長七尺二寸伏羲置琴女媧和之黃帝  
之琴名號鍾作清角之弄帝始制七情行十義之教七

情者喜怒哀樂懼惡欲七情也十義者君仁臣忠父慈  
子孝兄良弟悌夫義婦聽長惠幼順十義也帝制禮作  
樂之始也黃帝書說東海有度索山或曰度朔山謠呼  
也

此山間以竹  
索懸而度也

山有神荼鬱壘神能禦凶鬼為百姓除

患制驅讎之禮以象之帝以容成子為樂師帝作雲門  
大卷咸池之樂乃張樂於洞庭之野北門成曰其奏也

陰陽以之和日月以之明和風俗也

唐至德二年洞庭  
側有人穿地得古

鍾有古篆文黃帝時樂器也永泰二年巴陵令康通中  
得采藥人石季德於洞庭鄉採藥得古鍾上有篆岳州

刺史李萼進之可明莊子所謂黃帝於洞庭張樂誠不妄者也黃帝將會神靈於西山

之上乃駕象車六交龍畀方並轄蚩尤居前蚩尤旗也風伯

進掃雨師灑道鳳凰覆上乃到山大合鬼神帝以號鐘

之琴奏清角之音

師曠善於琴晉平公強請奏角弄師曠不得已一奏雲從西北起再奏大

風起大雨作平公懼而成疾焉

謂崑崙山之靈封致豐大之祭以詔後

代斯封禪之禮也於時崑崙山北玉山之神人也西王

母太陰之精天帝之女也人身虎首

山海經曰虎首一云虎色

豹尾

蓬頭戴勝顙然白首善嘯石城金臺而穴居坐於少廣

之山有三青鳥常取食此神人西王母也慕黃帝之德  
乘白鹿來獻白玉環又有神人自南來乘白鹿獻鬯帝  
德至地秬鬯乃出黃帝習樂以舞衆神又感玄鶴二八  
翔舞左右帝於西山嘗木果味如李狀如棠華赤無核  
因名沙棠食之禦水不溺帝立臺於沃人國西王母之  
山名軒轅臺帝乃休於冥伯之丘崑崙之墟帝遊華胥  
國此國神仙國也

伏羲生於此國  
伏羲母此國人

帝往天毒國居之因

名軒轅國

後來曰天竺去長安一萬二  
千里古史考曰在海外妄也

帝又西至窮山

女子國北又復遊逸於崑崙宮赤水及南望還歸而遺其玄珠使明目人離婁求之不得使罔象求而得之後為蒙氏之女竒相氏竊其玄珠沉海去為神

玄珠喻道蒙氏

女得之為水神

帝巡狩東至海登桓山於海濱得白澤神獸能

言達於萬物之情因問天下鬼神之事自古精氣為物遊魂為變者凡萬一千五百二十種白澤言之帝令以圖寫之以示天下帝乃作祝邪之文以祝之帝周遊行時元妃嫫祖死於道帝祭之以為祖神令次妃嫫母監

護於道以時祭之因以嫫母為方相氏

嚮其方也以護喪亦曰防喪氏

今人將行設酒食先祭道謂之祖餞祖送也顏師古注漢書云黃帝子為道神垂妄也崔寔四民月令復曰黃帝之子亦妄也皆不得審詳祖嫫祖之義也黃帝以天下大定符瑞並臻乃

登封太山禪于亭亭山

泰山下小山也

又禪於几几山勒功於

喬嶽作下時以祭炎帝以觀天文察地理駕宮室制衣

服候氣律造百工之德故天授輿服斧鉞華蓋羽儀天

神之丘黃帝著軒輿之銘帝以事周畢即推律定姓

孔子

京房皆行此事紀鍾甄聲帝之四妃

嫫祖嫫母費修女節是也

生二十五子

得姓者十二人

一云十三人

姬酉祈已滕箴任荀僖詰旋依

史記

云六十一姓惟釐嫫二姓不同所云黃帝姓公孫者十八代合一千五百年其十二姓十三代合一千七十二  
年史又云十二姓德薄不記錄亦不可也姬祈滕任僖  
詰皆有德有名者也所云黃帝姓公孫雖古史相傳理  
終不通且黃帝生於有熊長於姬水祇合以姬為姓至  
周武王稱黃帝十九代孫姬姓之後即黃帝姬姓非公  
孫也且周置五等諸侯以公侯伯子男後諸侯子孫多  
稱公孫言公之子孫也故連公子為姓者且有八十五  
氏皆非黃  
帝時人 黃帝九子各封一國

潘安仁詩言之未知其源

元妃嫫祖

生二子玄囂昌意並不居帝位玄囂得道為北方水神  
昌意娶蜀山氏之女生顓頊居帝位即黃帝嫡孫也號

高陽氏摯字青陽即帝位號金天氏黃帝之小子也少昊後有子七人顓頊時以其一子有德業高陽帝賜姓曼氏餘不聞黃帝以天下既理物用具備乃尋真訪隱問道求仙冀獲長生久視所謂先理代而後登仙者也時有甯子為陶正有神人過教火法出五色烟能隨之上下道成仙去往流沙之所食飛魚暫死二百歲更生作沙頭頌曰青葉灼爍千載舒萬齡暫死餌飛魚有務光子者身長八尺七寸神仙者也

至夏時餌藥養性鼓琴有道壽永者有

赤將子輿不食五穀啗百花而長年

堯時為木工木隨風上下即已二千

歲

有容成公善補導之術守生養氣谷神不死能使白

髮復黑齒落復生黃帝慕其道乃造五城十二樓以候

神人即訪道遊華山首山東之太山時致怪物而與神

仙通接神人於蓬萊回乃接萬靈於明庭京兆仲山甘

泉寒門谷口

在長安北甘泉雲陽

黃帝於是祭天圓丘將求至道

即師事九元子以地皇元年正月上寅日齋於首山

在河

東蒲坂縣

復周遊以訪真道令方明為御昌宇騂乘張若謬

度道焉

謬音習度舒氏切或作明

昆閭滑稽從車而至襄城之野七

聖俱迷見牧馬童子黃帝問曰為天下若何小童曰理

天下何異牧馬去其害馬而已黃帝稱天師而退至於

圜丘其國有不死樹食其子與葉人皆不死有丹巒之

泉飲之而壽有巨蛇害人黃帝以雄黃卻逐之其蛇留

一時而返

外國記云留九年也

帝令三子習服之皆壽三百歲北

到洪隄上具茨山

在於陽翟

見大隗君

密縣大隗神也

又見黃蓋童

子受神芝圖七十二卷適中岱見黃子中受九茹之方

一云至崆峒山見中黃真人其方原登崆峒山見廣成

州有崆峒之山應劭云在隴右非也

子問至道司馬彪注莊子云崆峒當斗之山也

一方在梁國虞城東下十三里是也廣成子

不荅帝退捐天下築特室藉白茅間居三月方往再問

修身之道乃授以自然經一卷黃帝捨帝王之尊託猥

豚之文登雞山陟王屋山開石函發玉笈得九鼎神丹

注訣南至江登熊湘山

熊山名陵在長沙湘山在長沙益陽縣

往天台山

受金液神丹東到青丘山見紫府先生受三皇內文大

字

抱朴子云有二十卷

以劾召萬神南至五芝玄澗登園壠蔭建

木觀百靈所登降采若乾之芝

一云花

飲丹巒之水南至

青城山禮謁中黃丈人乃間登雲臺山見寧先生受龍  
躋經問真一之道皇人曰子既居海內復欲求長生不  
死不亦貪乎頻相反覆而復受道即中黃真人黃帝拜  
謝訖東過廬山為使者以次青城丈人也廬山使者秩  
比御史主總仙官之道是五嶽監司也又封潜山君為  
九天司命主生死之錄黃帝以四嶽皆有佐命之山而  
南嶽孤特無輔乃章詞三天太上道君命霍山為儲君

命潛山為衡嶽之副以成之時參政事以輔佐之帝乃造山躬寫形象以為五嶽真形之圖黃帝往鍊石於縉雲堂於地鍊丹時有非紅非紫之雲見是曰縉雲因名

縉雲山

在婺州金華縣一云永康縣也

帝藏兵法勝負之圖六甲陰陽

之書於苗山

禹會計功於此集諸侯因名會稽也

黃帝合符瑞於釜山得

不死之道奉事太一元君受要記修道養生之法於玄

女素女受房中之術能御三百女玄女授帝如意神方

即藏之崆峒山帝精推步之術于山稽力牧著體診之

訣於岐伯雷公講占候於風后先生救傷殘綴金治之  
事故能祕要窮盡道真也黃帝得玄女授陰符經義能  
內合天機外合人事帝所理天下南及交趾北至幽陵  
西至流沙東及蟠木

蟠桃在度索山具在山海經也

帝欲棄天下曰吾

聞在宥天下不聞理天下我勞天下久矣將息駕於玄

圃以返吾真矣

崑山岑有玄玉圃也

黃帝修興封禪禮畢采首山

之銅將鑄九鼎於荆山之下以象太一於雍州

號州湖城縣有

石記黃帝鑄鼎於此舊日述州弘農郡地  
理志云馮翊懷德縣南之荆山是也

是鼎神質文

精也知吉知凶知存知亡能輕能重能息能行不灼而  
沸不汲自滿中生五味真神物也黃帝鍊九鼎丹服之  
逮至鍊丹成後以法傳於玄子此道至重盟以誠之帝  
以中經所紀藏於九嶷山東號委羽承以文玉覆以盤  
石其書金簡玉字黃帝之遺識也

夏禹得之亦仙化又云藏之於會稽覆金

山中  
去也

帝又以所佩靈寶五符真文書金簡一通封於鍾

山一通藏於宛委之山帝嘗以金鑄匙皆有名題上古  
之字也以記年月或有祠也時有薰風至神人集成厭

代之志即留冠劍珮舄於鼎湖極峻處崑臺之上立館其下崑崙山之軒轅臺也時有馬師皇善醫馬有通神之妙思有龍下於庭伏地張口閉目師皇視之曰此龍病求我醫也師皇乃引鍼於龍口上下以牛乳煎甘草灌之龍病愈師皇乘此龍仙去黃帝聞之自擇日卜云還宅升仙之日得戊午果有龍來垂胡髯下迎黃帝乃乘龍與友人無為子及臣僚等從上七十二人同去小臣不得上者將龍髯拔墜髯及帝之弓小臣抱其弓與

龍髯而號泣弓因曰烏號鑄鼎之地後曰鼎湖

至周王時封號

叔於此因曰號州古曰鼎州於漢名縣曰湖也

其後有臣左徹削木為黃帝象

率諸侯朝奉之臣僚追慕靡所指思或取几杖立廟而

祭或取衣冠置墓而守是以有喬山之冢

在上谷郡周陽縣又膚施

縣有黃帝祠四所祁州橋山黃帝冢在焉

黃帝曾遊處皆有祠五百年後喬

山墓崩惟劒與赤舄在焉一旦亦失

荆山記龍首記具載之也

黃帝

居代總百一十一年在位一百年自上仙後昇天為太

一君其神為軒轅之宿在南宮黃龍之體象

火體祭天神軒轅星

也一後來享之列為五帝之中方君也以配天黃帝土德

居中央之位以主四方

東方青帝太昊南方赤帝神農西方白帝少昊北方黑帝顓頊

以鎮星配為子名樞紐之神為佐配享於黃帝帝之子

昌意居弱水昌意弟少昊帝妃女節所生也帝之女溺

於東海化為鳥名精衛常銜西山木石以堙東海少昊

名摯字青陽即帝位號金天氏黃帝之子也顓頊高陽

氏黃帝之孫也各有聖德在位七十八年終母蜀山氏

所生都商丘濮陽禹強黃帝之胤不居帝位與顓頊俱

得道居北方為水神

顓頊已來以所興之地為名號

帝嚳高辛氏黃帝

之孫

蟠極生高辛也

帝嚳高辛神靈自言其名都偃師

亳州河南在

位七十年壽一百五歲帝堯陶唐氏黃帝之玄孫也姓

伊祁名放勳興於定陶以唐侯為帝

濟陰定陶又云定州唐縣

都於

平陽

郡在晉州

在位九十八年一百一十八歲舜有虞氏黃

帝八代孫禹為玄孫也按遁甲開山圖曰禹得道仙人

也古有大禹女媧十九代孫大禹壽三百六十歲八九

嶷山仙飛去後三千六百歲堯理天下洪水既甚人民

塹溺大禹念之乃化生於石紐山泉女狄暮汲水得石  
子如珠愛而吞之有娠十四月生子及長能知泉源代  
父鯀理洪水三年功成堯帝知其功如古大禹知水源  
乃賜號禹推之是黃帝玄孫無疑也殷湯黃帝七十代  
孫黃帝子少昊生嶠極嶠極生高辛十四世後即天一為殷王是也黃帝子孫各得姓

於事帝推律定姓者十二具在中卷少昊有子姓曼顓頊姬

姓以黃帝居姬水帝嘗子后稷姬姓也堯姓伊祁舜姓姚禹姓姁湯姓子

又張鄧軒路黃冠宋鄭白薛虞資伊祁申屠黃公託拔

昌意少子封北土以黃帝土德化俗  
以上為託以君為拔乃以託拔為姓黃帝有九子各封

一國

具在  
中卷

總三十三氏出黃帝之後黃帝相承凡一千

二百五十年自黃帝己酉歲至今

雲笈七籤卷一百

欽定四庫全書

雲笈七籤卷一百一

宋 張君房 撰

紀

元始天王紀

元始天王稟天自然之胤結形未沌之霞託體虛生之  
胎生乎空洞之際時玄景未分天光冥遠浩漫太虛積  
七千餘劫天朗氣清二暉纏絡玄雲紫蓋映其首六氣  
之電翼其真夜生自明神光燭室散形靈馥之煙棲心

霄霞之境鍊容洞波之濱獨秉靈符之節抗御玄降之  
章內氣玄崖潛想幽窮忽焉逍遙流盼忘旋瓊輪玉輿碧  
輦玄龍飛精流靄耀電虛宮東遊碧水豪林之境上憩  
青霞九曲之房進登金闕受號玉清紫虛高上元皇太  
上大道君受金簡玉札使奏名東華方諸青宮於時受  
命總統億津玄降玉華之女金晨之童各三千人飛龍  
毒獸巨虬千尋攬天奮爪備衛玉闕天威煥赫陳于廣  
庭飛青羽蓋流紫鳳章金真玉光豁落七元神虎上符

流金火鈴結編元皇位在玉清掌括上皇高帝之真

太上道君紀

洞玄本行經云太上道君者於西那天鬱察山浮羅之嶽  
坐七寶騫木之下清齋空山靜思神真合慶冥樞蕭朗自  
然擁觀萬化俯和衆生是時十方大聖至真尊神詣座燒  
香稽首道前上白道君不審靈寶出法從何劫而來至於  
今日凡幾度人為盡如是復有轉輪天尊是何劫生值遇  
真文得今太上之任致是得度何獨如之魏魏德宗高不

可勝願垂賜告本行因緣解說要言開悟後生道言天元  
輪轉隨劫改運一成一敗一死一生滅而不絕幽而復明  
靈寶出法隨世度人自元始開光至於赤明元年經九千  
九百億萬劫度人有如塵沙之衆不可勝量赤明之前於  
眇莽之中劫劫出化非可思議赤明已後至土皇元年宗  
範大法得度者衆終天說之亦當不盡今為可粗明真正  
之綱維標得道者之遐迹爾今聊以開示於後來領會於  
靈文之妙我濯紫晨之流芳蓋皇上之宵旰我隨劫死生

世世不絕常與靈寶相值同出經七百億劫中曾青帝劫  
終九氣改運於是託胎於洪氏之胞凝神於瓊胎之府積  
三千七百年至赤明開運歲在甲子誕於扶刀蓋天西那  
玉國浮羅之嶽復與靈寶同出度人元始天尊以我因緣  
之勲錫我太上之號封鬱悅那林昌玉臺天帝君位登高  
聖治玄都玉京實由我身尊承大法靈寶真文世世不絕  
廣度天人慈心於萬劫溥濟於衆生功德之大勲名繕於  
億劫之中致今報為諸天所宗焉

上清高聖太上玉晨大道君紀

洞真大洞真經云上清高聖太上大道君者蓋二晨之精  
氣九慶之紫煙玉暉煥耀金映流真結化含秀苞凝玄神  
寄胎母氏育形為人諱囁養字上開元母姓三千七百年  
乃誕於西那天鬱察山浮羅嶽丹玄之阿於是受籙紫皇  
受書玉虛眺景上清位司高仙為高聖太上玉晨大道君  
治藥珠日闕館七映紫房玉童玉女各三十萬人侍衛於  
是振策七圃揚青九霄騰空僊旌駕景馳飊徘徊八煙盤

桓空塗仰簪日華俯拾月珠摘絳林之琅實餌玄河之紫  
渠偃蹇靈軒領理帝書萬神入拜五德把符上真侍晨天  
皇抱圖乃仰空言曰子欲為真當存日中君駕龍驂鳳乘  
天景雲東遊桑林遂入帝門若必昇天當思月中夫人駕  
十飛龍乘我流鈴西朝六嶺遂詣帝堂精根運思上朝玉  
皇蒼蒼敷鬱儀以躡景晃晃散結璘以暨霄雙皇合輦後  
天而凋夫大有者九天之紫宮小有者清虛三十六天之  
首洞於是

高聖太上大道君初乘一景之輿駕八素紫雲攝希微蒼  
帝名錄豐子俱東行詣鬱悅那林昌玉臺天見玉清紫道  
虛皇上君受九暉大晨隱符

太上大道君次乘二景之輿駕七素絳雲攝中微赤帝名  
定無彥俱南行詣高桃厲冲龍羅天見玉清翼日虛皇太  
上道君受觀靈元晨隱符

太上大道君次乘三景之輿駕六素紅雲攝太微白帝名  
渠淵石俱西行詣碧落空歌餘黎天見玉清昌陽始虛皇

高元君受總晨九極隱符

太上大道君次乘四景之輿駕五素青雲攝玄微黑帝名  
齊元旋俱北行詣邠摩坦婁於翳天見玉清七靜導生高  
上虛皇君受沓曜旋根隱符

太上大道君次乘五景之輿駕四素黃雲攝始微上帝名  
接空子俱東北行詣扶刀蓋華浮羅天見玉清大明虛皇  
洞清君受玄景晨平隱符

太上大道君次乘六景之輿駕三素綠雲攝靈微中帝名

秉巨文俱東南行詣貝渭耶渠初默天見玉清始元虛皇  
太霄君受合暉晨命隱符

太上大道君次乘七景之輿駕二素紫雲攝宣微下帝君  
名宏膚子俱西南行詣冲容育鬱離沙天見玉清七觀無  
生虛皇金靈君受齊暉晨玄隱符

太上大道君次乘八景之輿駕一素靈雲攝洞微真帝名  
泗澄攄俱西北行詣單綠察寶輪法天見玉清八觀高元  
虛皇淳景君受高上龍煙隱符

太上大道君又乘洞景玉輿駕太霞紫煙玄景之暉攝九微內帝君名申名閑及上皇九玄九天諸真仙王等俱仰登彌梵羅臺霄絕寥丘飛元雲根之都玉清上天見玉清紫暉太上玉皇明上大道君受高清太虛無極上道君隱符三天君列紀

上清真人總仙大司馬長生法師主三天君姓栢成諱歛生字芝高乃中皇時人歲在東維之際誕于北水中山栢林之下夫名為歛生者以母感日華而懷孕年九歲求長

生之道至十四與西歸公子巨靈伯尹俱師事黃谷先生  
黃谷先生者能為不死修靜無為不營他術含精內觀凝神  
空漠思真安炁以致不死後五百年遇金仙石公甯氏先  
生晁夜童子三人受胎精中記化胞內經養神上法解結  
之要又登太帝滄浪山洞臺中雙玉穴酣紫明芝液遇上  
清萬石先生授以乘飛駕虛八氣景龍之躋反胎守白越  
度之法又廣成子授以丹青玉爐鍊雲根柔金剛之經又  
授以飛煙發霜沈雪浮日朱之法又遇始元童子丰車小

童受虛皇帝錄仙忌真戒化一成萬解形之法後遇玉清  
文始東王金暉仙公號曰玉皇二道君告以胎閉靜息內  
保百神開洞雲房堅守三真之事後復詣二玉皇君問雲  
房之道三真之訣二玉皇君曰三真者兆一身之帝君百  
神之始真也若使輔弼審正三皇內寧太一保胎五老扶  
精一居丹田司命護生一居絳宮紫氣灌形一居洞房三  
素合明於是變化離合與真同靈明堂雲宮紫戶玉門黃  
闕金室丹城朱牕皆帝一之內宅三真之寶室也於是雲

房一景混合神人上通崑崙下臨清淵雲蓋嵯峨林竹蔥  
芊七靈迴轉七門幽深金扉玉匱符籍五篇公子內伏外  
牽白元混一成形呼陽召陰上帝司命各保所生微哉難  
言非仙不傳又問呼陽召陰出入無方之法氣出神變之  
道二玉皇曰呼陽者三氣之所出入也召陰者六丁之所  
往來也若得三氣之所生能知六丁之所因者則陽氣化  
為龍車陰氣變為玉女則騰轉無方輪舞空玄之上也夫  
氣之所在神隨所生焉神在則氣成神去則氣零氣者即

二十四神之正氣是為二十四氣也氣能成神神亦成氣散之為雲霧合而為形影出之為仙化入之為真一上結三元下結萬物靜為兆身動為兆神是以常混合二十四神變化三五之真人混成正一合為帝君即兆本神也夫人受生於天魂結成於元靈天魂生之根元靈生之胎流會太一達觀三道神積玉宮液溢玄府津流地戶澤憇洞房日月煥於霄暉五神混於元父元父主氣化散帝極玄母主精變會幽元是以司命奉符固形扶神公子內守桃

康保魂左攜無英右引白元雲行雨施萬關流布也後二  
玉皇授歛生大洞真經三十九章迴風混合帝一之道斷  
環割青盟誓而傳得為上清真人位曰總仙大司馬長生  
法師主三天君理太玄都閭風玉臺總司學道之仙籍主  
括三天之人神萬仙受事於玉臺五帝北朝於靈軒  
矣

青靈始老君紀

洞玄本行經云東方安寶華林青靈始老帝君者往在

白氣御運於金劫之中暫生鬱悅金映雲臺那林之天  
西婁無量玉國浩明玄嶽厥名元慶於此天中大建功  
德初無懈心勲名仰徹朱陵火宮書其姓名記於赤簡  
仙道垂成而值國多綵女元慶遂以寄世散想靈魔舉  
其濁目朱宮輟其仙名一退遂經三劫中值火劫改運  
元慶又受氣寄胎於洪氏之胞上天以其先身好色故  
轉為女子朱靈元年歲在丙午誕於丹童龍羅衛天洞  
明玉國丹霍之阿改姓洪諱那臺年十四敬好道法心

願神仙常市香膏然燈照暝大作功德諸天所稱名標  
上清南極上靈紫虛元君託作傭人下世教化見那臺  
貞潔好尚至法迴駕於丹霍之阿授那臺靈寶赤書南  
方真文一篇於是那臺勵志殊勤自謂一生作於女子  
處於幽房無由得道因齋持戒思念願得轉身為男丹  
心遐徹遂致感通上真下降元始天尊時於琅碧之溪  
扶瑤之丘坐長林枯桑之下衆真侍坐是日那臺見五  
色紫光曲照齋堂於是心悟疑是不常仍出登牆四望

忽見東方桑林之下華光赫奕非可勝名去那臺所住  
數百里中隔礙曠谷滄海之口心懷踊躍無由得往因  
叉手遙禮稱名那臺先緣不厚致作女身發心願樂志  
期神仙高道法妙不可得攀日夕思念冀得滅度轉形  
為男歷年無感常恐生死不得遂通彌齡之運有於今  
日天河隔礙無由披陳今當投身碧海沒命于天冀我  
形魂早得輪轉更建功德萬劫之中冀見道真言訖便  
從牆上投身擲空命赴滄海極淵之中紛然無落即為

水帝神王以五色飛龍捧接女身俄頃之間已於懸中  
得化形為男子乘龍策虛飛至道前於是元始即命仙  
都錫加帝號於火劫受命輔於靈寶青帝玉篇七百年  
中火劫數極青氣運行隨元滅度以開光元年於彌梵  
羅臺霄絕寥丘飛元雲根之都滄霞九雲之墟元始又  
錫安寶華林青靈始老帝君號

丹靈真老君紀

洞玄本行經云南方梵寶昌陽丹靈真老君者本姓鄭

字仁安大炎之胤生於禪黎世界赤明天中生有三氣  
之雲纏其身朱鳥鼓翮覆其形三日能言便知宿命年  
及十二面有金容玉顏便棄世離俗遠遊山林於寒靈  
洞宮遇玄和先生授仁安靈寶赤書五氣玄天黑帝真  
文一篇智慧上品十戒而去仁安於是奉戒而長齋大  
作功德珍寶布施以拯諸乏割口飴鳥功名徹天因於  
西那國遇天洪災大水滔天萬姓流漂仁安於洪波之上  
汎舟誦戒書黑帝真文以投水中水為開道百頃之地

鳥獸麋鹿虎豹師子皆往依親悉得無他是時國王百口登樓而漂沒歎不能得度仁安見王垂沒乃浮舟而往以所佩真文授與國王王敬而奉之水劫即退翕然得過王既得免真文於是即飛去入雲中莫知所在仁安失去真文退仙一階運應滅度託命告終死於北戎之阿暴露靈屍三十餘年形體不灰光色鮮明無異生時在於北戎長林之下時國王遊獵放火燒山四面火布去其靈屍之間百步之內火不得然麋鹿虎豹莫不

依親王怪而往見靈屍之上有三色之光雲霧鬱冥鳥獸帀繞王乃伐薪圍屍放火焚燒于時屍放火中鬱起成人坐青煙之上指拈虛無五色煥爛左右侍者仙童玉女三百餘人肅然而至凡是禽獸依親之者並在火中皆得過度仁安以赤明二年歲在丙午於伽摩坦婁于翳天中洞寥之嶽改姓洞浮諱曰極炎受錫南單梵寶昌陽丹靈真老帝號丹靈老君也

中央黃老君紀

洞真九真中經云中央黃老君者太上太微天帝君之  
弟子也以混皇二年始生焉年七歲乃知長生之要天  
仙之法仍眇綸上思欽納真玄蕭條靈想棲心神源解  
脫於文蔚之羅披素於空任之肆於是太上授九真之  
訣八道秘言施修道成受書為太極真人

金門皓靈皇老君紀

洞玄本行經云西方七寶金門皓靈皇老君者本乃靈  
鳳之子也靈鳳以阿羅天中降生於衛羅天堂世界衛

羅國王取而蓄之王有長女字曰配瑛意甚憐愛常與共戲於是靈鳳常以兩翼扇女面後十二年中女忽有胎經涉三月王意怪之因斬鳳頭埋著長林丘中女後生女墮地能言曰我是鳳子位應天妃王即名曰皇妃生得三日有羣鳳來賀玄哺玉霜洪泉曲水八鍊芝瑛年八歲執心肅操超拔俗倫常朝則謁日暮則揖月於重宮之內王設厨膳物不味口天作大雪一年不解雪深十丈鳥獸餓死王女思憶靈鳳往之遊好駕而臨之長

林丘中歌曰

杳杳靈鳳綿綿長歸悠悠我思永與願違萬劫無期何  
時來飛於是王所殺鳳鬱然而生抱女俱飛徑入雲中  
王女今於景霄之上受書為南極上元君常乘九色之  
鳳此女前生萬劫已奉靈寶致靈鳳降形得封南極元  
君之號皇妃功德遐徹天真感降以上元之年歲在庚  
申七月七日中時元始天尊會於衛羅王國鳳麟之丘  
坐騫華之下衆真侍坐是時皇妃所住室內忽有日象

如鏡之圓空懸眼前皇妃映見天真大神普在鏡中長  
林之下一室光明於是自登通陽之臺遙望西方見鳳  
生丘上紫雲鬱勃神光煒煥非可得名去皇妃所住五  
百步許逼以女根處在宮內無由得往須臾忽有神鳳  
來翔集於臺上皇妃白鳳言曰西方有道心願無緣不  
審神鳳可得暫駕見致與不於是鳳即敷翮使坐翮上  
舉之徑至道前元始天尊指以金臺王母即汝師也便  
可施禮皇妃叩頭上啓惟願衆尊特垂哀矜則枯骸更

生言畢金母封以西靈玉妃之號卽命九光靈童披霜  
羅之蘊出靈寶赤書白帝真文一篇以授皇妃受號  
三百中仍值青劫改運皇妃方復寄胎於李氏之胞三  
年於西郡王國金壘幽谷李樹之下而生化身為男子  
改姓上余諱日昌至開光元年歲在上甲元始天尊錫  
西方七寶金門皓靈皇老君號

五靈玄老君紀

洞玄本行經云北方洞陰朔單鬱絕五靈玄老君者本

姓浩字數明蓋玄皇之肩太清之胄生於元福棄賢世  
界始青天中年十二性好幽寂心翫山水遠於家中或  
去十日時復一還時天下災荒人民餓殍一國殆盡數  
明於地境山下遇一頃巨勝身自採取餉飼窮乏日得  
數過救度垂死數千餘口隨取隨生三年不訖他人往  
覓莫知其處是時辛苦形體憔悴不暇營身遂致疲頓  
死於山下九天書其功德金格記其玉名度其魂神於  
朱陵之宮後帝遣金翅大鳥常敷兩翼以覆其尸七百

年中尸形不灰至水劫改運水泛尸漂於無崖之淵水  
過而後數明尸泊貝渭邪源初默天鬱單之國北壘玄  
丘四十年中又經山火盛行焚燒尸形於火中受鍊而  
起化成真人五色之雲覆蓋其上至開明元年於北壘  
玄丘改姓節諱靈會元始天王錫靈會洞陰朔單鬱絕  
五靈玄老君號

雲笈七籤卷一百一

欽定四庫全書

子部

雲笈七籤卷一百二

詳校官監察御史<sub>臣</sub>邱庭澍

檢討<sub>臣</sub>何思鈞覆勘

總校官庶吉士<sub>臣</sub>倉聖脉

校對官庶吉士<sub>臣</sub>潘庭筠

謄錄監生<sub>臣</sub>胡金芝

欽定四庫全書

雲笈七籤卷一百二

宋 張君房 撰

紀

混元皇帝聖紀

太上老君者混元皇帝也乃生於無始起於無因為萬  
道之先元氣之祖也蓋無光無象無音無聲無宗無緒  
幽幽冥冥其中有精其精甚真彌綸無外故稱大道焉  
夫道者自然之極尊也於幽無之中而生空洞焉空洞

者真一也真一者不有不無也從此一氣化生後九十  
九萬億九十九萬歲乃化生上三氣三氣各相去九十  
九萬億九十九萬歲三合成德共生無上也自無上生  
後九十九萬億九十九萬歲乃化生中三氣三氣各相  
去九十九萬億九十九萬歲三合成德共生玄老也自  
玄老生後九十九萬億九十九萬歲乃化生下三氣三  
氣各相去九十九萬億九十九萬歲三合成德共生太  
上也自太上生後復八十一萬億八十一萬歲乃生一

氣一氣生後復八十一萬億八十一萬歲乃生前三氣  
三氣各相去八十一萬億八十一萬歲三合成德共生  
老君焉老君生後八十一萬億八十一萬歲化生一氣  
一氣生後八十一萬億八十一萬歲化生後三氣三氣  
又化生玄妙玉女玉女生後八十一萬億八十一萬歲  
三氣混沌凝結變化五色玄黃大如彈丸入玄妙口中  
玄妙因吞之八十一年乃從左腋而生生而白首故號  
為老子老子者老君也此即道之身也元氣之祖宗天

地之根本也夫大道玄妙出於自然生於無生先於無  
先挺於空洞陶育乾坤號曰無上正真之道神奇微遠  
不可得名故曰吾生於無形之先起乎太初之前長乎  
太始之端行乎太素之元浮游幽虛出入杳冥觀混沌  
之未判視清濁之未分盼髣髴之興光瞻響罔之眇然  
窺惚恍之容象覩鴻洞之無邊步宇宙之曠野歷品物  
之族羣惟吾生之卓兮獨立而無倫消則為氣息則為  
人矣

老君者乃元氣道真造化自然者也強為之容則老子  
也以虛無為道自然為性也夫莫能使之然莫能使之  
不然亦不知其所以然不知其所以不然故曰自然而  
然者也至若以地為輿操天為蓋馳騖曠蕩翱翔八外  
不足比其大也窮幽極微至纖無際析毫剖釐刀鈇鋒  
銳不足言其細也絲竹八音簫韶九成宮商調暢律呂  
和平不足言其聲也玄黃煥爛丹青燿煜焜煌煒燁麗  
靡華飾不足言其色也皦耀熠燿神明清惚風流電遊

霆振響逸不足言其疾也結根九泉沈嶠八海水凝藪  
澤淵渟嶽峙不足言其止也陰陽不測變化無倫飄颻  
太素師虛友真不足言其神也光燭玄昧洞鑒無形仰  
觀太極俯察幽冥不足言其明也影離響絕雲銷霧除  
鑽冰求火探巢捕魚不足言其無也滌宇宙之塵穢掃  
雲漢於天衢下坑宏而無底上寥廓而無隅包六合而  
造域跨八維以為區不足言其虛也然則道固無形夫  
何為名故乃託虛寄無假道以言之言之不足以盡意

故歸之自然自然者理之極乃道之常也故衆聖所共  
尊道尊德貴夫莫之爵而常自然惟老氏乎老君者乃  
元生之至精兆形之至靈也昔於虛空之中結氣凝真  
強為之容體大無邊相好衆備自然之尊上無所攀下  
無所躡懸身而處不頽不落著光明之衣照虛空之中  
如含日月之炁也或在雲華之上身如金色面放五明  
自然化出神王力士青龍白獸麒麟師子列於前後或  
坐千葉蓮花光明如日頭建七曜冠衣晨精服披九色

離羅帔項負圓光或乘八景玉輿駕五色神龍建流霄  
皇天丹節蔭九光鶴蓋神丁執麾從九萬飛仙師子啓  
塗鳳凰翼軒或乘玉衡之車金剛之輪駟駕九龍三素  
飛雲寶蓋洞耀流煥太無燒香散華浮空而來伎樂駭  
虛難可稱焉或坐寶堂大殿光明七寶之帳朱華羅網  
垂覆其上仙真列侍神丁衛軒幡幢旌節騎乘滿空或  
金容玉姿黃裳繡帔凭几振拂為物祛塵或玄冠素服  
白馬朱駿仙童夾侍神光洞玄夫妙相不可具圖學上

道之子宜識真形真形不測但存此足以感會也夫學  
不知其本如嬰兒之失母能知其母又知其子既知其  
子復守其母母者何也無中之有也是道也至真也宗  
極也一切所崇也隨感而應應有著微微則妙象恍惚  
乍存乍亡屈者資之得伸暗者向之獲明迷者歸之果  
定故神明之君應著之時形像相好動靜有則以正理  
邪周徧無滯救度無窮故稱為聖或君或臣或師或友  
依緣相逢逢此應者皆由精心感道道氣通感是故隨

機適品矣夫大道處於無形無形非凡所見應感以形  
妙相隨時而出或玉姿金體爰及肉身或飛或步或尊  
或卑或山或岱或夷或夏不可測量隨感一妙應已則  
藏或來無所從去無所至洞有洞無周徧一切悟者即  
心得道迷者觸向乖真能崇識老君尊而敬之則得正  
真道矣論曰夫道不可見見而非也道不可聞聞而非  
也蓋示理教俱空寂而不動也而道亦能使未見者見  
未聞者聞此明境智相發感而遂通也然通寂雖殊其

至一焉故曰道常無為而無不為以此論之蓋由人心者也夫心之念道凡有二種一念法身七十二相八十  
一好具足微妙三界特尊二念真身猶如虛空圓滿清  
淨不生不滅若於此相未能明審須憑圖像係錄其心  
當鑄紫金寫此真形泥水銅綵稱力所為殿堂帳座幡  
華燈燭隨心供養如是真身想念丹到功德齊等若能  
洞觀非身之身圖像真形理亦無二是以敬像隨心獲  
福報之輕重惟在其心念念增進自然成道所謂人能

念道道亦念人即此之謂也

太微天帝君紀

紫度炎炁神玄變經云太微天帝君生於始青之端九曜神靈之肩玄氣未凝之始結流芳之胄而法形焉連炁映靈紫雲曜電玄煙流靄丹暉纏絡妙覺潛啓仍採納上契條暢純和吐納冥津遂降靈生之胎哺兼洪泉曲芝行年二七金容內發玉華外映洞慧神聰朗覩虛玄編掌帝號其所任乎澄流九霄之霞飛眺洞清之源

明機覽於極玄領綜運於億津積感加於冥會妙啟發  
於自然是以得禦紫度炎光迴神飛霄登空之法修行  
內應上登玉清高上之尊道備以付中央黃老君焉

青要帝君紀

洞真青要紫書金根衆經云青要帝君者九陽元皇王  
帝之弟子也以中皇元年歲在東維天始告暉君育於  
玄丘王國無崖之天瓊林七寶之下溟濛九域之濱法  
化應圖三日啟晨厥姓堯諱字伯開仍有九龍翼君側

七色瓊鳳簷君身神麟含芝以哺玄天女吐精以灌真  
玉童擲華以却穢神妃散香以攘塵含漱胎息法秀自  
然年冠二六面發金容體生靈符容與順化應運浮沈  
棲心明霞之境遨遊玉圖之墟執抗元皇之策落景九  
域之丘逍遙流盼遂經萬劫方還清齋雲房之間以紫  
雲為屋青霞為城黃金為殿白玉為牀五氣交結高臺  
連甍玉陛文階鳳闕四張金童侍側玉華執巾天仙羅  
衛五千餘人九陽元皇玉帝君時乘碧霞九鳳飛輿瓊

輪羽蓋從桑林千真萬乘億騎飛行侍仙三十六人宴  
景霄庭來降於君與君共登九老仙都之京九曲之房  
命西臺龜母開雲鳳之蘊紫錦之囊出紫書真訣玉篇  
已受於君君修行道備位登玉清太上大道君授君飛  
雲羽蓋流紫鳳章金真玉光豁落七元金神虛符流金  
火鈴青玉壘九色無縫之章單青羽裙飛行上清於是  
縱景萬變迴轉五晨策虛召月攝日揚輪洞化離合與  
真同靈解形遞變儵欵億千上登三元朝謁玉宮遊覽

無涯廓落九天出入洞門攜契玉仙仰稟高上元始太  
真應氣順命位掌帝晨縱統萬道無仙不闕下攝十天  
山靈河源五嶽四海莫不上隸於君者也

總真主錄紀

洞真變化七十四方經云上清總真主錄南極長生司  
命君姓王諱改生字易度乃太虛元年歲洛西番孟商  
啓運朱明謝遷天元冥邈三暉翳昏晨風迅虛六日明  
焉君誕于東林廣昌之城長樂之鄉行年十四棄世離

俗心慕神仙遇紫府華先生授陰陽補養削死修生三五變鍊七九復神道御中和胎息之方行其術壽至四百年登玄谿之澗隱巖之房詣屠先生受金丹鍊雲芝之根柔金剛之經飛煙起霜沈雪之方招霞咽精之道服御七年與日合景行經神州空洞之山遇太一真人戴先生受帝君九鍊之方

中天玉寶元靈元老君紀

洞玄本行經云中天玉寶元靈元老君者本姓琨字信

然蓋洞元之肩中和之胄生於善忍世界青元天中流  
生之丘受生一劫默然不語混沌無心食氣為糧天地  
未光無常童子於無色之國授信然靈寶赤書赤帝真  
文一篇於是而言是時惟修一身初不開張廣度天人  
善功未充運應更滅於青元天中命終流生之州靈體  
絕立之下經一百餘年死而不灰常有黃氣覆蓋其上  
至水劫流行天下溟然靈骸四面涌土連天遏雲水道  
信然應化鬱然而起更生成人改姓通班諱曰元氏水

過之後天地開光三象玄曜七元高明元始天尊以開  
光元年歲在己丑於高桃厲沖龍羅天反魂林中錫元  
氏玉寶元靈元老君號

赤明天帝紀

洞玄本行經云昔禪黎世界隊王有女字絳音

一日生

乃不言年至十四王怪之乃棄女於南浮長桑之阿空  
山之中女乏糧食常仰日咽氣引月服精自然充飽體  
不疲損常行山中周市巖洞忽與神人會於丹陵之舍

栢林之下執絰音右手題赤石之上語絰音曰汝雖不能言可憶此也絰音私心自悼受生不幸口不能言棄在窮山誓心自願得還人中當作功德無有愛惜百劫之後冀與願會天為其感遣朱宮靈童下教絰音理身之術受赤書八字之音於是能言絰音晨夕朝禮天文道真既降逆知吉凶役使百靈坐命十方於山而出還於王國時天下大旱人民焦燎王大懼怖祈請神明絰音往白王言常聞山中有女不言能感於天王識之乎

王於是悟識是王女乃迎女還宮見女能言王見愧顏  
女顯其道為王仰笑天降洪雨注水至丈於是化形隱  
景而去仍更寄形王氏之胞運未應轉方又受生還為  
女身父字以福慶名曰阿丘曾年及人禮乃發大慈之  
心布施窮乏獨寢一處不襪於物然燈燒香長齋幽室  
丹誠感積道為之降以開光元年十方大聖尊神妙行  
真人會南圃丹霍之阿三元洞室青華林中衆真侍坐  
香華伎樂五千餘衆真文奕奕光明洞達映朗內外雲

景煒燦如星中之月去阿丘魯所住舍數十里中丘魯  
時年十六見舍光明内外朗照疑似不常乃出南向望  
見道真丘魯歡喜於是作禮遙稱名曰丘魯今日幸會  
身覩天尊愚蒙下質不知所陳歸命十方天中之天惟  
蒙玄鑒賜以誠言萬劫滅度冀得飛仙魔見丘魯心發  
大願力過魔界因化作五帝老人往告丘魯云我受十  
方尊神使命來語汝曰靈寶法興五道方行每欲使人  
仁愛慈孝恭奉尊長敬承二親如聞汝父當聘汝身已

相許和受人之言父母之命不可不從宜先從之人道  
既備餘可投身違父之教仙無由成女荅魔言我前生  
不幸夙無因緣功德未充致作女身晨夕尅勵誓在一  
心用意堅固應於自然生由父母命歸十天誠違父教  
不如君言魔見丘魯執心曷正於是便退丘魯自云道  
既高邈無緣得暢乃聚柴發火焚燒身形冀形骸得成  
飛塵隨風自舉得至道前於是火然丘魯投身紛然無  
著身如蹈空俄頃之間已見丘魯化成男子立在道前

元始天尊始命南極尊神為丘魯之師授丘魯十戒靈寶真文元始天尊又告南極尊神曰丘魯前生萬劫已奉靈寶功德未備致寄生轉輪至于今日化生人中見吾由法即得化形當更度人九萬九千乃得至真大神為洞陽赤明天帝

南極尊神紀

洞玄本行經云南極尊神者本姓皇字度明乃閩浮黎國宛王之女也生於禪黎世界赤明天中生乃當貴父

為國王女居宮內金牀玉榻七色寶帳明月雙珠光照  
內外王給妓女數千人國中珍寶無有所乏常欲布散  
大建功德志極山水訪及神仙逼限宮禁津路無緣志  
操不樂心自愁煎王意憐愍慰諭百端問女意故女終  
不言淚落如雨切無一歡王加其妓樂日日作唱度明  
聞樂常如不聞獨在一處清淨焚香長齋持戒日中乃  
餐王知其意乃於宮中為踊土作山山高百丈種植竹  
林山上作臺名曰尋真玉臺度明棄於宮殿登臺棲身

遮遏道徑人不得通單影獨宿一十二年積感昊蒼天  
帝君遣朱宮玉女二十四人乘雲駕鳳下迎度明當去  
之夕天起大風雨雷電激揚地舍旋轉驚動一國王大  
振懼莫知所從天曉分光失去山臺不見其女天帝迎  
度明於陽丘之嶽丹陵上舍柏林之中朱鳳侍衛神龍  
翼軒玉童玉女三百餘人於後大劫數交天地易位度  
明應在棄落之例南上感其丹至朱宮書其紫名化其  
形骸於無始之胞一劫而生得為男身於南丹洞陽上

館明珠七色寶林赤帝梵寶昌陽丹靈真老君錫度明  
以南極上真之號

雲笈七籤卷一百二

欽定四庫全書

雲笈七籤卷一百三

宋 張君房 撰

傳

宋真宗御製翊聖保德真君傳序

蓋聞天心降顧邦家所以會昌靈命丕昭神道所以協贊考載籍之攸記固今古而同符矧復吾宗在于戰國基緒方始精感寔繇或山祇而見形或帝所而協夢其來已久斯謂不誣乃有接三統而開基將隆景業冠百

神而儲佑茂顯明徵奠條梅之名區號龜王之與主見之於

翊聖保德真君矣太祖肇膺元厯觀德而無言太宗祇紹睿圖順期而前告若夫述玉晨之寶賸序斗極之仙階告國命之延洪示真科之秘蹟洪威顯洽屏乎物魅神姦諄誨博臨揚乎天祺民祉由是靈壇爰峙徽稱斯崇欽奉於芬馨仰祈於先覺固惟九域咸被底綏豈止三秦獨增忻戴暨茲冲眇纘乃基局仰嘉話之在人瞻

至神之佑世由是載稽茂典恭益尊名以為上帝之恒  
符文考之真應安可默而無述故當垂之不刊爰詔輔  
臣俾詮靈訓詢求斯至編帙旋成想風烈而昭然思音  
徽而可覲誠足鏤之金板祕于蘭臺披封奏歸美之心  
願裁於序引屬乙夜觀文之暇聊志於歲時題曰翊聖  
保德真君傳云爾

翊聖保德真君傳

推忠協謀同德守主佐理功臣樞密使開府

儀同三司行吏部尚書同中書門下平章事

上柱國太原郡公臣王欽若編集

建隆之初鳳翔府鰲屋縣民張守真因遊終南山忽聞  
空中有召之者聲甚清徹守真驚懼四顧無所見默行  
悚聽約數里又聞語云汝若先行吾即在後如是者數  
日守真莫能測既還其家又聞於室中曰吾受命降臨  
汝何為頑梗如此不聽吾言吾若不為宋朝大事當已  
粉碎汝矣守真方異之而且懼因曰未審是何星辰如

此臨降守真性本愚戇且昧神祇願勿憑陵必無事奉  
乃曰吾是高天大聖玉帝輔臣授命衛時乘龍降世但  
以非正真之士無以奉吾教汝有異骨不類常流汝可  
虔心奉吾道訓也守真曰竊聞在男曰巫在女曰覡守  
真雖處凡庸恥為茲類又曰吾上天之神非鬼魅也五  
嶽四瀆吾能役使汝若迴心入道勤奉香火當令汝應  
大國之徵命受真主之恩遇豈同巫覡之輩耶守真曰  
神人既若此教導敢不虔事乃設酒肉之饌以祀焉又

聞言曰吾神人也汝何為以腥穢瀆我以汝未曉不欲  
罪汝此去但以香茶及素食鮮果為供吾雖不食歆汝  
之意也守真稽首而謝又曰吾為汝天上之師汝別有  
人間之師但訪高士以求度焉守真乃禮古樓觀先生  
梁峯為師度為道士遂於所居之側擇隙地出家則於  
北帝宮內立殿以事神旦暮崇奉頗極精至神謂之曰  
觀汝虔心稱吾教導貞潔之士可以驅邪吾先將誨汝  
劔法俾汝為民除妖後當令汝結壇俾汝為國祈福守

真再拜曰守真本實凡庸粗懷愚直當緣夙生奉事乃  
致今獲歸依願以至心永奉靈德壇儀劔法恭俟靈訓  
真君曰劔法有三但以鋼鐵鍛為利刃吾目一視便可  
用也有疾之人俾汝揮擊邪氣銷鑠其人無損或地祇  
作孽水族生妖分野為災國家軫慮當以上劔治之或  
山澤之怪飛走之雄震駭閭閻侵毒黎庶當以中劔治  
之或魑魅之徒夔魍之輩挾邪暴物作祟害人當以下  
劔治之守真曰三劔之法已聞命矣結壇之儀伏俟指

教

真君曰結壇之法有九上三壇則為國家設之其上曰  
順天興國壇凡星位三千六百為普天大醮旌旗鑑劒  
弓矢法物羅列次序開建門戶具有儀範其中曰延祚  
保生壇凡星位二千四百為周天大醮法物儀範降上  
壇一等其下曰祈穀福時壇凡星位一千二百為羅天  
大醮法物儀範降中壇一等儻非時禱祀不及備此三  
壇亦當精潔詞章鮮異花果叩鼓集神懇禱而告去地

九尺焚香以奏亦可感應也中三壇則為臣僚設之其上曰黃籙延壽壇凡星位六百四十其中曰黃籙臻慶壇凡星位四百九十其下曰黃籙去邪壇凡星位三百六十此三壇所用法物儀範各有差降下三壇則為士庶設之其上曰續命壇凡星位二百四十其中曰集福壇凡星位一百二十其下曰却災壇凡星位八十一所用儀範量有等差此九壇之外別有應物壇或六十四位或四十九位或二十四位法物所須各以差降士民

之類可量力而為之如臣庶上為帝王祈祐當作祈穀  
福時壇凡一千二百位或為父母師尊禳災祈福當為  
醯設壇隨儀增益也守真拜而受之自爾多有徵驗不  
能備紀乾德中太宗皇帝方在晉邸頗聞靈應乃遣近  
侍齋信幣香燭就宮致醯使者齋戒焚香告曰晉王久  
欽靈異欲備俸緡增修殿宇仍表乞勅賜宮名

真君曰吾將來運值太平君宋朝第二主修上清太平  
宮建十二座堂殿儼三界中星辰自有時日不可容易

而言但為吾啟大王言此宮觀上天已定增建年月也  
今猶未可使者歸以聞太宗驚異而止太祖皇帝素聞  
之未甚信異遣使齎香燭青詞就宮致禱召守真詣闕  
備詢其事守真具言之且曰非精誠懇至不能降其神  
仍以上聖降靈事迹聞奏太祖召小黃門長嘯於側謂  
守真曰神人之言若此乎守真曰陛下儻謂臣妖妄乞  
賜按驗戮臣於市勿以斯言執贖上聖詔守真止於建  
隆觀翌日遣內臣王繼恩就觀設醮移時未有所聞繼

恩再拜虔告須臾真君降言曰吾乃高天大聖玉帝輔臣蓋遵符命降衛宋朝社稷來定遐長基業固非山林魑魅之類也今乃使小兒呼嘯以此吾言斯為不可汝但說與官家言上天宮闕已成玉鑠開晉王有仁心晉王有仁心凡百餘言繼恩惶懼不敢隱具錄以奏因復面言神音歷歷聞者兢悚太祖默然異之時開寶九年十月十九日之夕也翌日太祖升遐太宗嗣位尋召守真於瓊林苑為周天大醮作延祚保生壇醮罷真君降

言於內臣王繼恩曰吾有言汝當為吾奏之曰

建隆元年奉帝言乘龍下降衛人君掃除妖孽猶閒事  
縱橫整頓立乾坤國祚已興長安泰兆民樂業保天真  
八方效貢來稽首萬靈振伏自稱臣親王祝壽須焚禱  
遍相虔潔向君親吾有捷疾一百萬諸位靈官萬輩人  
若行忠孝吾加福若行悖逆必誅身賞罰行之既平等  
天無氛穢地無塵愛民治國勝前代萬年基業永長新  
繼恩錄之於簡翌日以聞太宗覽之驚異稽首謝曰國

家之幸宗廟之慶虔荷上聖賜此格言命緘藏於內殿  
尋遣內供奉官王守節起居舍人王龜從就終南山下  
築宮方卜地於終南鎮

真君忽降言於龜從等曰此地乃修建上帝宮闕之地  
不可易也於是乃定凡三年宮成中正之位列四大殿  
前則玉皇通明殿次紫微殿次七元殿次真君所御殿  
東廡之外有天蓬九曜東斗天地水三官四殿西廡之  
外有真武十二元神西斗天曹四殿又有靈官堂南斗

閣並列星宿諸神之像豎鐘經二樓齋道堂室靡不完  
備建碑以紀其事題曰上清太平宮一如真君預言之  
制命常參官一人監宮擇道士焚修每歲三元及誕節  
上本命日並遣中使致醮祀神之夕上望拜焉歲或水  
旱或國家將舉事率致禱焉初宮成真君忽降言謂王  
龜從等曰汝奉詔修宮勤則至矣然何為不開日月華  
門不畫八小殿壁堦墀甃甃亦未嚴備惟求速成以冀  
恩寵然上天亦不掩爾功亦不赦爾罪守節龜從頗切

驚懼然已奏訖役不及增備惟稽首祈謝及至闕皆獲  
增秩賜白金千兩既而守節染疾而亡龜從歿於兵刃  
此乃不掩功不赦罪之戒明矣太平興國初太宗皇帝  
親征太原真君忽降言於守真曰官家已臨汾晉非久  
克復城池汝當令監宮內臣等設醮以謝勝捷於上帝  
守真等曰國家大事乞俟捷音真君曰上天已定勝負  
也踰旬而王師告捷監宮等以聞帝遣內臣盧文壽齎  
內庫香藥御署詞章詣宮陳醮以謝上帝是夕真君降

言曰官家設此大醮上帝與諸天皆喜國祚延遠過於  
有唐矣至六年守真以乾明節詣闕朝賀召見因面奏  
曰聖真下降俯為昌朝乞降詔加號以荅靈貺上允其  
奏尋下詔曰太平宮神受命上穹降靈下土茲茲致薦  
肸蠁有徵大庇斯民屢垂丕貺宜加美號以荅神休其  
封神為翊聖將軍詔命至宮守真焚香以告真君忽降  
言曰汝當上問官家所言翊聖者翊於何聖守真數日  
疑懼不敢荅復言曰汝但馳奏官家不罪汝守真遂具

章以聞太宗覽之召近臣謂之曰

玉帝輔臣所輔翊者上帝也當以此意報守真令啟白也既而內臣傳命到宮守真詣殿焚香以告真君曰此意是也七年守真復詣闕朝賀真君忽降言曰吾有言汝當聞於官家曰

大道興隆陰謀滅諸天衆聖皆欣悅宋朝社稷甚延年太平景運初興發君上端心顯明哲愛民治國常須切萬年基業永長新金枝玉葉無休歇守真得之到闕以

聞詔賜守真紫衣號崇元大師自後每遣使醮告真君  
或有言守真皆密以聞至道初忽降言謂守真曰吾建  
隆之初奉上帝命下降衛時今基業已成社稷方永承  
平之世將繼有明君吾已有期却歸天上汝等不復聞  
吾言矣儻國家祈禱但嚴潔焚香北面告吾雖不降言  
當授福衛護宗社又曰汝遇吾下降至今三十五年勤  
亦多矣

上帝已有符命授汝為五土之主此限滿日升汝仙官

汝亦不久住也自是不復降言明年閏七月十六日守  
真謂門人等曰吾已領符命今將去矣言訖而化既而  
聖上嗣位崇奉之典率遵舊式洎受元符封泰山建王  
清昭應宮於官中寶符閣之西北隅作凝命殿殿後為  
凝命閣以奉真君大中祥符七年詔曰誕敷寶命仰荷  
於至神昭報殊微虔增於懿號蓋為邦之大典庇民之  
深旨也而況翊宣元化式表衆靈司陰隲於含生播明  
威於福地當王基肇啟固降治而已彰洎文考續承復

先期而斯應由是亟營珍館備薦徽章蒙介福於無垠  
佐鴻圖於累盛顧惟眇質紹撫綿區屬典禮之交修實  
祺祥之沓委緬懷幽贊罔怠欽崇是用益以丕稱奉之  
茂則式達至精之懇庶伸祇荅之文期克享於寅恭永  
保寧於品彙爰頒成命俯告宰司深體予懷共宣其事  
翊聖將軍宜加號曰

翊聖保德真君自真君之降世也或時有所授人即傳  
錄而岐雍之間有物魅妖怪為害之極者皆投誠致告

則守真祈禱奉教而往靡不祛殄凡所靈驗不可勝紀  
今錄其傳聞者云守真常朝禮至

玉皇大殿觀其題曰通明殿不曉其旨因焚香告曰通  
明之理竊所未諭敢祈真教真君曰

上帝在無上三天為諸天之尊萬象羣仙無不臣者常  
陞金殿殿之光明照於帝身身之光明照於金殿光明  
通徹無所不照故為通明殿諸天帝君萬靈侍衛仙衆  
梵佛悉來朝謁仰視其殿惟見大光明中

上帝儼然仙班既退光明徧徹諸天焉有王叟者年七十餘少事戎帥老而退居終南鎮膽氣雄傑談五代時事歷歷可聽每聞妖怪誕妄之事則扼腕切齒自真君之始降未甚信嚮洎目覩靈異欣然歸仰自後常日二時赴宮焚香伏拜雖風雨霜雪未嘗暫曠一日忽告守真啟殿門瞻禮焚香且泣曰老夫本懷剛氣幼事軍門不信邪魔常守正直百生有幸得遇上真今已衰耗大期將至所願歸全之後得在左右以備驅使為萬足矣

真君降言而許之未幾叟無疾而終踰旬守真忽於真君殿前聞空中有呼其名者曰我鐵輪將軍也汝何以略不見錄守真仰而問曰真君左右有四將軍常侍殿中守真常所處事未知鐵輪將軍是何星辰名位空中又曰我即王叟也曾有至願乞侍左右今蒙收錄使掌鐵輪位在四將軍之下汝今後或有醮祭勿忘吾名也真君嘗謂守真曰吾每巡遊周天有諸位靈官捷疾吏兵數逾百萬彗孛妖沴知吾騎從所至皆屏跡遠避獄

鎮海濱可以麾召而世之物魅邪怪豈足數耶吾念汝  
正直付汝劒法俾汝為民救患攘災汝宜精勤無或懈  
怠積功立名加惠及物上天所鑒當錄汝名若慢道輕  
教不守虛寂自有陰責矣吾若一怒萬物立為埃塵汝  
其可當乎然汝每有責罰乃吾小將軍怒汝不專謹爾  
汝自宜致恭於彼汝所興念彼各預知不可欺心貽汝  
禍患守真常一日從容焚香虔誠問曰守真觀釋氏之  
教言天上天下無如佛者未知

三清之上品位何若願賜真語以蠲蒙滯真君降言曰  
佛即西方得道之聖人也在

三清之中別有梵天居之於上帝則如世之九卿奉天  
子也守真曰其教流演頗盛於世又何理也真君曰教  
流中夏帝之念也隨世盛衰亦帝之念也守真曰道釋  
經典並垂於世未審崇奉何者即獲其福

真君曰太上道德經大無不包細無不納修身鍊行治  
家治國世人若悟其指歸達其妙用造次於是信奉而

行豈惟增福諒無所不至矣釋氏之四十二章經制心  
治性去貪遠禍垂慈訓誡證以千惡亦一貫於道矣奉  
之求福固亦無涯至于周公孔子皆列僊品而五經六  
籍治世之法治民之術盡在此矣世雖諷誦多不依從  
若口誦而心隨心隨而事應仁義信行禮智之道常存  
于懷豈惟正其人事長生久視之理亦何遠矣守真又  
嘗啟請云終南山中赤谷神祠者近鄉之人多所祈祀  
屠牛擊豕以為饗饌酒樂喧沸民氓鼓舞若斯之事其

獲佑乎

真君曰終南山實名山福地人凡境聖今古皆然興妖致邪殺命祈福以茲俟福斯亦遠矣既而草竊潛匿其下捕賊者積薪焚之祠宇煨燼寂無靈異建隆末長安進士劉頴頗有文學出於流輩嘗詣宮再拜禱曰頴欲知將來位秩高卑願賜靈語

真君降言曰天賦汝文性不賦汝祿位汝若學道退閑當猶延永若妄求進身慮促汝壽算也頴聞之不悅而

退後三歲果無成而卒雍熙中華山希夷先生陳搏卒  
於張超谷石室中世多傳其羽化守真朝禮之次因焚  
香啟告曰華山陳搏近卒時人謂之尸解未審其人功  
行證仙階乎敢希上真略賜指諭

真君降言曰搏之鍊氣養神頗得其要然及物之功未  
至但有所主掌爾端拱中知鳳翔府比部郎中高凝祐  
嘗就宮致禮既去

真君忽降言於監宮李鑄曰高凝祐行虧忠信死非久

矣鑄竊志之俄而凝祐秩滿還京為三司判官鑄聞之  
乃復焚香啟告曰高凝祐今為此職又何福耶真君降  
言曰死將至矣數月而凝祐卒吏部尚書宋白乾德中  
家于盤屋有弟顯小字曰岐哥年十餘歲為狐魅所惑  
號呼無度舉動失常忽力敵數夫家人莫能制醫砭之  
輩至者必遭凌撲白因齋心遣所親詣宮致禱懇求衛  
護

真君降言曰汝去吾當令守真往彼守真受教而往方

至其家坐於客館而岐哥已覺惺惺失次家人遽出迎  
拜守真具問之因厲聲呼其名須臾岐哥捽其首從中  
唯唯而出至守真前戰汗悚息守真呵責移時鬼乃露  
形叩頭伏罪守真以術戮之應手而斃岐哥仆地良久  
而蘇即獲平愈

真君嘗忽謂守真曰山下李靖廟中有狐鬼數十盤泊  
於彼本方地神適有馳報慮其為妖害民汝可速往逐  
之守真稟命仗劍而去須臾坐於廟前震呼數四俄而

狐鬼數十悉出徧列於前惶惑驚悸守真乃責之曰此  
上真下降之地汝輩豈宜褻處今未欲戮汝可速返林  
莽無以血汗我靈劒鬼等相顧狼狽匍匐而散守真自  
往至還曾不移時寓宮道士王德淵問其所適守真具  
道之德淵曰自此至彼往復二十里何其速耶守真曰  
我離廟時以劒揮下庭樹低枝在地可驗也德淵俟曉  
躍馬而觀馬果於廟前聞腥穢之氣不可近得斷枝而  
還始再拜稱異時又有妖狐數百在邠州城中頗為怪

異守真聞之因焚香致告具道其事願奉教往彼除之  
真君降言曰此狐妖輩嘗於長安南山中化形為菩薩  
之狀誘彼居民捨財為寺其間迴心歸善亦十有八九  
上帝以此故授其符命俾為邠州土地亦有限數俟其  
歲滿當自遠去無能為害汝不必往也開寶中鳳翔府  
民陳英美家有山魈為怪投擲瓦礫日盈其庭時放煙  
焰欲焚其舍財物耗散親族愁苦召術士禳禁命僧徒  
課誦皆不能止乃移居遠遁亦躡蹤而至英美計無所

出因齋戒持香躬詣宮庭精虔以告

真君降言謂守真曰汝今速受吾命令往為除守真再拜負劍躍馬再宿而至其家而擲瓦之聲喧囂如故觀者填隘皆曰此道士必不能去此怪守真乃盥滌嚴潔整衣引劍而入其怪忽然而止是夕為壇於庭中守真嘿劍立其上厲聲徐呼曰山魃鬼何在乎儻為妖未已當出與吾較勝不然則當去萬里之外釋汝之罪如是移時悄無影響自是其家安肅乃隨守真詣宮陳醮以

謝焉又長安富民楊氏家有鬼物為怪擲瓦縱火一日萬變聚族憂惶莫可寧處時有術士李捉鬼者尤善符禁楊氏召之方及其門若為物所擊匍匐而起俄復顛隕如是者三遂狼狽而走楊氏復召僧衆為道場誦經作梵唄以祛之俄又若有物攫其道具或投於屋或棄於井羣僧惶懼而去乃至擣衣砧石亦自空中騰起三三兩兩相逐而落中庭遇物凌觸而物無所損如是之怪尤衆不可具紀楊氏素聞

真君之靈乃躬持香燭等馳赴焚禱具言其怪且求驅殄

真君降言曰汝當速歸吾令守真繼往也守真尋再拜而往其家士民觀者填隘其戶守真易衣整冠呪水揮劍行於四隅其怪即寂然無聲守真謂楊氏曰此妖伏矣請為醮以祛之向夕結壇焚章禮畢而去一城之衆稽首稱歎守真既歸楊氏隨詣宮中陳醮以謝又富民劉文璨者忽為狐鬼所惑心神恍惚動止不寧市中逢

道流語之曰子面有妖氣必為邪物所著真君下降可  
虔心禱之必愈斯疾文璪乃自齋香燭晨夕馳赴中路  
為鬼物所追或為僧尼婦女或為商賈萬端誘惑不進  
文璪既迷且惑復遇道流於路具告其故道流曰是皆  
鬼物也汝宜逕往無或退志為羣妖所害文璪心悟不  
數日奔迫至宮潔齋懇至百拜殿下

真君降言曰知汝遠來吾今令守真為汝除邪是夕守  
真立文璪於庭中守真仗劒嚙水呵叱數四文璪懍然

踣於地移時而起曰適先生呵叱之際見數人若神將者各擒二鬼而去文琛惶駭不覺顛仆令神思清爽如酣醉之始醒也百拜而去自

真君之臨降官吏民庶不遠千里或馳誠遙禱或齋戒朝拜以祈真嘏時有所聞大抵多隨其性習加以訓勗人臣依於忠人子依於孝清淳者示之格言貪酷者警以要道詞甚平易頗叶音韻然獲聞之者至寔今據其所傳錄之如左乾德中驪山白鹿觀道士馮洞元朝禮

之次焚香虔告曰洞元講孔子之書依老氏之教積有  
年矣而修身鍊行未得真旨幸逢

上真敢求一言

真君降言曰

到境始知安形忘靈物閒真空須照達幽微即大還動  
觀無障礙希夷合自然功成神莫測變化可沖天去住  
由自己三官赦舊愆命曹除罪簿六丁奏上天衆生要  
修道須知無上源

洞元百拜虔謝而去開寶中侍御史路冲奉詔知鳳翔府就宮禮請守真就府署中陳醮祈降是夕潔齋致禱曰冲身居職守阻拜真儀輒以蘋藻虔祈降鑒乞賜真語以導蒙昧

真君降言曰盡力事君以為忠臣濁財勿顧邪事莫聞整雪刑獄救療人民動合王道終為吉人積愆累咎必有沈淪衆生本無形之性配有形之軀曠劫以來不能自悟自有無極世界不夜之鄉混合太虛杳冥同理

又曰

六合乾坤內衆生多不會造業向前行有如鷺江海如  
將智慧觀自越千重海

沖再拜錄而奏之左補闕王龜從一日齋心詣宮焚香  
懇禱曰凡庸賤類釁咎無涯幸逢

上真願賜靈誨如何修身以獲遐壽

真君降言曰勸汝修鍊莫如精勤精勤不急上聖皆聞  
太平降世用武興文無文則不正用武則益君食祿利

勿違王命行吉善但守清貧清貧者響合天地濁富者  
像火投冰投冰者火緣漸滅積惡者自貫其身自貫者  
殃及七祖地府下痛害及親吾懸千尺之索提釣有緣  
之人道之尊德之貴大道能生一切物衆生頭象天足  
象地中心空然合真理鑿戶牖以為室房室之中有一  
物亦無形亦無影杳杳冥冥人不識若能識者得長生  
陽在天陰在地二氣同和誠有謂空中造化乃自然自  
然之中生萬類天不高地不卑大道混合虛無理學道

衆生審欲聞此是修行崇妙門開寶中丞相沈倫嘗連  
綿卧疾虔心遣使詣宮陳醮致告曰倫濁穢之質病惱  
所侵如何修行得免灾患敢期聖語以導愚蒙

真君降言曰靈物不病形軀自安形軀有病返照而看  
來人錄之歸致於倫倫捧覽之驚喜曰吾得之矣尋而  
疾愈復遣人詣宮醮謝道士王德淵因遊終南山寓止  
宮中勤奉香火好養生而性褊多所恚怒忽一日

真君降言謂之曰汝學道修真先當調習其性以順天

和忘諸有為勿耗心識融怡凝湛道乃可見復戒之曰  
莫管內莫管外來往真靈無罣礙所居安樂是汝家各  
自勤行莫相待莫相待先達之人無滯礙真空妙樂有  
天堂與聖相同滅諸罪

又曰

妙理須行到周旋皆合道舉措見真空真空無煩惱混  
合太虛中自有無聲樂地鑪天竈間皆同凡聖道常將  
智慧觀可向今生了

德淵曰上感

真君降言教示不曉前篇內與聖相同減諸罪願垂誨  
諭

真君曰汝若除煩入靜鍊心修真積累其功數盈之後  
泥丸百節元神靈通而自同於聖天堂妙樂無所不至  
豈更有諸罪也故言與聖相同減諸罪太平興國中駕  
部員外郎李鑄嘗知鳳翔府備覩靈應俄復奉詔監宮  
凡十餘年志頗嚴潔

真君前後降語僅十餘篇其所錄者數首

一曰

建隆之初方稟希夷上帝命吾衆聖皆知乘龍下降列宿相隨五嶽受命王張地祇潛扶社稷密佐明時吾要李鑄知吾降期不得輕泄免漏天機

又曰

與吾獨異佐國與吾以道理民與吾慈善理家與吾不飲自醉醒時理民醉時理神此語是延年益壽之法吾

勸府主記取

又曰

為官求理在貞明智慧俱通臨事清觀天行道合陰德  
食君爵祿常若驚為吾洗心復換骨背凡入聖奔長生  
天宮快樂勝凡世不夜之鄉挂一名

又曰

府主累世為人生中國與吾清直莫行斜曲與吾積善  
累功與吾輔佐明主與吾洗雪黎民與吾掛心刑獄

上帝若知名天官也尅取捨在世轉流之財但修取有形之象獲隨身之功得無量之福與吾不得因循不奈時光迅速靈官賞汝功勲天曹與汝添福若一一依吾聖言必得延年益壽

又曰

年登七十餘仕世不久居饒君壽百歲問汝得幾秋地府直須怕冥司難請求有功無驚懼積罪必遭誅子孫難替代早覺莫癡愚

又曰

有緣無緣福業相牽有緣福至無緣業纏三業大罪信  
根不圓若遵吾語如倚太山

又曰

聽吾之語必延年亦將康健保安然至誠不退修真理  
今生若在玉皇前

又曰

為汝虔心星辰下降來駕於玄風去乘於法雨開盲愚

之耳目迴積惡之人心盡歸投於正路因汝醮告上玄惡人盡來歸敬此汝之功也吾已與汝聞於

上帝俾汝獲福也汝宜清者重清白者重白明者重明勿初勤末怠中路變異迴清為濁迴善為惡設靈官奏聞

上帝若知有誤於吾也又七月十日夜

真君降言汝忠勤奉國惠愛臨民更要用心勿違吾誠未遇吾之前所作諸惡吾與汝並銷除也遇吾之後況

無諸業左右已錄汝功也更須晨夕與吾積其善功勿得怠惰吾聖言也又曰但行王事洗雪冤沈常差靈官護助汝也或有諸事常行平正依吾聖言況是太平君治化諸事前程汝但莫憂

又曰

托托莫憂煩軍府自然安每事依王道從他天下傳

又曰

為主虔誠拜上玄宋朝社稷保長安不久太平天下樂

一家受福鎮如山

又曰

為主合虔誠將心助太平  
天宮繫其職每事更宜精  
衆聖皆知汝舉措直須驚  
一朝功滿後永住看三清

又曰

生前莫亂憂已後亦無愁  
主判陽間事凡人得幾秋  
但依聖言著長生上天求  
鑄每受一篇未嘗不晨夕  
諷誦焉又嘗謂鑄曰汝年  
及八十別無修鍊之功未  
免掩形

升魂亦當有所主掌爾鑄再拜曰此生得遇上真下降  
屢受祕語他日儻獲主掌願與守真同列真君曰人間  
官職守真不及汝天上名位汝不及守真也但心歸真  
正升仙階亦有時矣淳化中西京畱守中書令趙普嘗  
遣使備禮致醺虔祈願聞休咎

真君降言曰趙普扶持社稷甚有功勲

上帝所知賜汝福壽然以大妨小幽府亦有冤對當啟  
誦真經告祈天地首懺前非吾亦與爾達于

上帝庶解茲咎汝官職壽數已有限矣其使錄之而去  
普跪讀感涕因焚香謝過復遣人詣宮設醮給事中參  
知政事賈黃中嘗遣人投誠致禱以祈聖誨

真君降言曰聖主命臣臣之事君道佐當代心依古人  
善惡無隱姦邪必聞君臣合道可立功勲

又曰

愛民用心賞罰平等但依吾語合家保安

殿中丞張卓嘗乞聖言

真君曰大道養汝性陰陽生汝身為吾勤行道為吾勤  
修真公廉常用意憂恤在乎民遇時佐明主清濁上帝  
聞濁富終不久清貧為天人莫教人道富從他人笑貧  
自有真家富清高不愧貧

又曰

形凡性不凡為國顯清廉家積千餘口有罪自家擔

又曰

但服陽和氣天竈再熏蒸地鑪別有用道德日日新延

年積福應真空若至清虛無有妙理度脫有緣人

道士周務本嘗詣宮奏詞一通乞降真語

真君降言曰汝有詞言慕上天其如心意隔關山仙宮不遠如指掌內外工夫全未圓陰官察錄無譴過免墮  
酆都數百年依吾所語合吾道要履三清應不難  
張守真子元濟常齋戒詣宮

真君降言曰汝父守真遭逢於吾故令子孫受福汝豈不聞信州龍虎山張道陵至今子孫不絕亦逢於上聖

得道之後應及後世汝亦與吾有緣直須在家孝於父母食祿忠於帝王立身揚名豈非好事又誨之曰

無事莫街行勤學必立名揚名在天下道廕有長生

又曰

為過自家知善惡日相隨分明違天道問汝阿誰癡  
淳化中

真君降言示守真曰當今顯聖明修德動三清上天歸正道四海息交兵八方欽睿聖五穀盡收成勸君須修

德上帝賜長生

又曰

關西賊寇緣應時數官家須指揮招捉使臣莫殺平人  
官家修德之際正賊須翦滅又嘗降言誠輔道士曰  
千人心不同萬人心皆錯舉意不相通與聖難相約  
真君又嘗降言誠官吏等曰

每存忠信齊其天文武班行自有賢為主萬年定基業  
常憂黎庶恐饑寒長行德行合其道燒香虔祝告虛玄

但願國安君長久齊心輔佐太平年

又嘗降言誠朝臣等曰

擎天之柱著功勲包羅大海佐明君文王治世及堯日  
輔弼乾坤在忠臣為主直須行決烈死生齊却戴皇恩  
常行吉善合其德慎終如始莫憂身

進翊聖保德真君事迹表

臣欽若言臣聞高穹睠命元聖膺期必有至神聿彰幽  
贊謨訓標於保乂雅頌載於監觀考古今之冥符見天

人之交感臣欽若誠慶誠朴頓首頓首伏以靈源錫羨  
炎德嗣興景祚有開丕徵允赫惟玉晨之元輔奉金闕  
之明威降精爽不貳之民顯陰陽莫測之造佐大邦之  
啟運告神宗之紹圖兆自幾先聳乎聞聽繇是增隆靖  
館茂薦徽稱鉅典崇嚴純禧響答乃至搢紳卿士橫目  
烝黎稽首以瞻睟容洗心以佇靈誥隨其性之遠近視  
其器之淺深時亦戒以徽音警其蒙惑諄諄之誨咸洞  
其隱微蚩蚩之氓潛識其真正或魑魅為孽夏鼎之所

未刊或膏肓致妖秦醫之所難究亦復俯聆虔懃遙授  
指蹤真教猥臨羣邪必殄竊冥之象既炳於人衆飭歛  
之遊亟還於霄極永載蕊芬之祀潛施睠祐之祥凡厥  
祕言悉存舊錄將伸倫次以示方來敢謂微臣猥承明  
詔齊心仰誦盥手兢持莫究淵冲粗伸紬繹竊念上真  
之茂躅實為昭代之明徵豈夫庸瑣之材輒敢形容其  
事伏望皇帝陛下垂旒注覽援翰摘文賜名以紀芳蕤  
作序以冠篇首式彰寅奉永耀洪休臣無任瞻天望聖


戰汗屏營之至其所錄成

真君事迹三卷謹隨表上進以聞臣誠惶誠懼頓首頓首謹言

批荅

省表具知夫妙道為大本於若沖至神無方昭乎善應  
惟玉虛之元輔冠瓊簡之真階幽贊裁成亶彰陰陽當  
藝祖之受命降福穰而炳靈逮文考之紹休告帝期而  
前兆式申美報肇建殊庭奉禳禱之嚴科介蒼黔之丕

祉若乃夷微委鑒肸蠭攸憑示諄誨以惟勤昭明威而  
叵測恍兮之應猶響泠然之馭亟旋自朕慕承寅加崇  
奉儼辟儀於恭館薦嘉號於元都念祕誥之具存表格  
思之攸盛期於綜緝以耀休徵卿任冠樞衡道熙邦采  
雅資博洽庶就編聯而能紬緇帙以惟精封縹囊而來  
上懇求制序復冀命名再循淺昧之辭曷敘直聰之烈  
勉從勤請良積覲甄嘉尚之懷寤興無捨所請宜依



雲笈七籤卷一百三